

**Saturday, December 13, 2025**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**CM**

Chief Minister Pu Lalduhoma chuan zu leh ruihhlo vangin Mizo thalai an thi tam tih a sawi a, ruihhlo chu nasa zawka do a ngaih thu leh a zuar thinte chu dim an ngai lo tih a sawi bawk.

Pu Lalduhoma hian nizan khan Lammuala Mizoram Youth Festival chu hman puin, Mizorama Pathian lal ram a thlen daltu lian tak chu zu leh ruihhlo a nih thu a sawi a. Ruihhlo vangin nula leh tlangval hna thawk thei rual Home-ah tam tak an awm chuan a rilru a ti na thin tih a sawi a, ruihhlo chu huaisen leh nasa zawka do a ngaih thu leh a ti thin tute tan sim theih a ni tih a sawi.

*(Byte: Chief Minister)*

CM chuan Mizoram Youth Festival chu thalai chi hrang hrang Biak In khata lawi ho ngai lo te Pathian faka inpawl hona hun remchang a nih thu a sawi bawk a ni.

<><><>

**RD&AD MINISTER**

RD Minister Prof. Lalnilawma'n vawiin khan State Institute of Rural Development & Panchayati Raj Silver Jubilee lawmna inkhawm Aijal Club-a buatsaih chu khuallian niin a hmanpui a, Silver Jubilee souvenir a tlangzarh nghal bawk.

Minister chuan SIRD&PR chu Mizoram tan a tangkai thu leh tangkai leh zual tura ngaihtuahna senga, hmalaknate zauh zel a ngaih thu a sawi a. Self Help Group-ten thil chi hrang hrang zawrh tham an tharchhuah tawh thu tarlangin SHG-te thil tharchhuah leh siamte chu 'Selhel' brand hmanga market tur a nih thu sawi a. Thingtlangte tana hmasawna thlentu ni zel turin SIRD chu duhsakna a hlan a ni.

SIRD&PR hi kum 2000 October 16 khan Mizoram sawrkar chuan a din a. Rural Development & Administration Department hnuaiyah Autonomous Body niin, State leh Central sawrkar-in a enkawl na senso hi an intum sem a ni.

<><><>

**MRB**

Mizoram Rural Bank chuan nimin khan cheng vaibelchhe sing khat Total Business an tlin an lawm a, Mizoram chief secretary Pu Khilli Ram Meen chuan a hman pui.

MINECO-a MRB Head Office Auditorium-a hun hmanah, Chief Secretary Pu Khilli Ram Meena chuan, MRB-te'n vaibelchhe singkhat zet mai business an nei thei chu mellung pakhat mai ni lovin an inpekna, tei rei peihna leh thawh hona tha lanchhuahna a nih thu a sawi a. Tuna Bank dinhmun a that thu te, Net NPA 0% a ni thei leh CRAR 16.80% a ni theite chu lawmawm a ti a. Nasa zawka thawk zel tur leh Mizoram Rural Bank chu mipuite dinhmun tha zawka hlangkaitu ni zel se a duh thu a sawi bawk.

Mizoram Rural Bank Chairman Pi Sheryl L. Vanchhong chuan, kum 1983-a din MRB chuan tun dinhmunah District 11-ah Branch 106 a neih tawh thu leh Financial Inclusion-ah te, Sawrkar laipui leh State Sawrkarin ruahmanna a siam hrang hrangte tihlawhtlingtu leh Bank dangte nena khaikhin pawha a titha ber pawl an nih thu a tarlang a. Mipuite rin ngam Bank-ah hian anmahni duhsaktute avanga vaibelchhe singkhat business an tlin thei chu lawmawm a tih thu a sawi.

Nimina hun hmanah hian India rama Regional Rural Bank 28-te tana Logo angkhat an siam chu tlangzarh nghal niin he Logo hi Mizoram Rural Bank pawhin nimin atangin a hmang tan a ni.

<><><>

### **TRIBUTE TO MARTYS AT PARLIAMENT ATTACK**

Kum 2001 a India Parliament House firfiakten an beihna a nunna chan te hriatreng nan vawiin khan zahna pangpar dah a ni.

He hun hi Parliament House hung chhunga anmahni hriat rengna lungphun bulah neih a ni a, Pangpar dahtute zingah hian Vice President leh Rajya Sabha Chairman ni bawk CP Radhakrishnan, Prime Minister Narendra Modi bakah Sorkar laipua Union Minister Piyush Goyal, Jitendra Singh, Kiren Rijju leh Arjun Ram Meghwal te an tel a, anni bakah hian eptu lam party atangin Lok Sabha Leader of Opposition Rahul Gandhi leh Congress hruaitu hlun Sonia Gandhi bakah MP thahnem takin kum 24 liam ta a India Parliamnet venhimna atana an nun hlan ta te hriatrengna hmunah hian zahna pangpar an dah bawk.

President Droupadi Murmu chuan India Parliament thih thleng a firfiakte laka venghim tute chu India ram ropuina tilangtu an nih mai bakah hei hian India chu rawl rala chetna laka ram khauh tak a ni tih a ti lang Chiang hle a ni, a ti a.

Union Home Minister Amit Shah, Defence Minister Rajnath Singh, External Affairs Minister Dr.S Jaishankar leh Minister of State for Information and Broadcasting Dr L Murugan te chuan thuchhuah siamin India rorelna in sang ber Parliament House firfiakte laka an nun thap a venghim tute chu an chhuan takzet thu bakah theihngilh an nih ngai dawn lo thu an thuchhuah siamah hian an tarlang hlawm a ni.

<><><>

### **ECI APPOINTS SRO FOR SIR**

India ram chhunga inthlanna felfai a awm theihna tur atana state thenkhat a vote thlak thei thlitfim beihpui, Special Intensive Revision neih mekah Special Roll Observer ruat an ni.

Election Commission of India (ECI) thuchhuahin a tarlan danin, heng Special Roll Oberver-te hi state pariat West Bengal, Tamil Nadu, Uttar Pradesh, Gujarat, Kerala, Madhya Pradesh, Chattisgarh leh Rajasthan te tana ruat an ni a, an ni hian state tina political party te an kawm dawn bakah electoral roll kaihnawih a thuneitute leh thawktute hnathawh dan an vil zui dawn bawk thu ECI thuchhuah hian a tarlang bawk.

<><><>